

## **‘Ea’ a tāku tauturu i tāku tamaiti?**

### **Tauturu’ia**

Kāre te nūmero i te ‘apinga ‘inangaro’ia e te kātoatoa. Inārā e tā’anga’anga ana te tangata i te numero i te au ra o tō rātou ora’anga no reira e mea pu’apinga ki te ora’anga o tā’au tamaiti no te au rā ki mua e kia meitaki rātou i te ‘āpi’i nūmero. Tēta’i rāvenga māmā rava atu e tupu ei tēia, kia tauturu’ia tā rātou au ‘anga’anga nūmero. ‘Ē āite ana āinei tā’au tauturu i tā’au tamaiti i te tāmoumou nūmero mei tā’au rāi ki te tatau puka? E ‘akāri ana āinei koe i tēta’i tū meitaki no runga i te ‘anga’anga nūmero nō te kāinga? Ko koe te ākara’anga meitaki rava ātu na tā’au tamaiti’ē ka ‘āite tēna ‘ākara’anga nō te nūmero mei tō’ou rāi.

‘E ngō’ie ‘ua te ‘inangaro i te au puka ‘ē tatau ana tā’au tamaiti, te au tātā’anga e te au tārekareka i te ‘āpi’i. Tautū’ia kia ‘āite to’ou ‘inangaro ki tā rātou ‘āpi’i nūmero e tāmoumou ra.

### **‘Akarongo ki a rātou**

Ko te ‘akakoro’anga o te Parāni Tānumero e ‘akamāro’iro’i i te tamariki kia kimi i te au tū rāvenga no te tatau tārevake e te ‘akamārama atu nō te rēira ki tēta’i kē. Mei te mea e te ākamārama ra tā’au tamaiti no tā rātou pa’uanga - ‘AKARONGO’IA. Kāre pa’a te pa’u’anga e aiteite ki tā’au ‘inārā kāre i te mea ‘ē kua tārevake tā rātou. ‘Irinaki e ka ‘tūkēkē te au rāvenga ‘akatanotano i te tārevakē. I tēta’i taimē ka ‘inangaro pa’a koe i te tā’anga’anga apinga tauturu mei te pitopito, me kāre te pēni e te pēpa ‘ei ‘akaari nā rātou ‘ea’ a te ‘āite’anga ki a rātou. ‘Akapapa’ia koe no te ‘akamata’anga’ i te au rāvenga tūkētūkē.

### **‘Oake’ia atu nō rātou te tuātau tāmoumou nūmero**

Tei te au ngāi kātoatoa te nūmero .Noatu ‘ē ‘ia mataiti mē kāre ra, te kite o tā’au tamaiti, e ma’ata te au tuātau nō rātou ‘ei tāmoumou i tā rātou nūmero.

Mē tē ‘āpi’ipi’i ra tā’au tamaiti i te tāre - tāre’ia ‘e au ‘apinga. ‘E tāre pa’a koe i te au ‘apinga kangakanga i runga i te ta’ua, ‘ē ‘ia mōtokā ‘ē ‘oro ra nā te mataāra. E te vai atū ra tēta’i au ‘aka’āite’anga. Ko te putuputu o te tāre a tā’au tamaiti, ko te meitaki rava atu ia.

Mē tē ‘āpi’i ra tā’au tamaiti i te ‘akaputu – ‘akaputu’ia e au ‘apinga’ Ka māmā ‘ua pa’a tēia, mei te nūmero o te au mātipi i runga i te kaingākai, kāpiti atu i te au kōkai i runga i te kaingākai mē kāre ra ‘ei apinga mei te moni no te au ‘apinga i roto i te toa mama’ata.

‘Auraka katoa ‘oki’ ē ngaropōina te kiriti nūmero Uia atu ki tā’au tamaiti ‘ea’ a tā rātou ‘āpi’i nūmero i te āpi’i e kia tā’ānga’anga’ia i te au rā. Mē tē tāmoumou ra rātou i te ‘āpi’i tātu’anga uia atu tētai au ui’anga nō tēnā. “Ea’ a te tu’anga o te tamariki i roto i tō mātou ‘uānga.?’” Ea’ a te tu’angā ū toe? Kāre nā tēia ‘ua e ‘āpi’ipi’i i a rātou māri rā ko te ‘akāri ē tē vai nei rai te nūmero i te ora’anga ‘ō tēiane i ao.

### **Tētai’i au tūranga tei mātau’ia nō te nūmero:**

- Te Moni – te tāre ē te ‘akapapa. Te moni tiaki, te pāngika, te ‘oko’oko...
- Te Vāito ‘apinga – te roroa, te ma’ata’anga, au ‘apinga tunu kai...
- Te Au ‘Aerenga – te tatau nūmero i runga i te au ‘akakite’anga tuatua na te au tamariki mearikiriki, te vāito i te mamao ‘ō tēta’i ngāi ē te viviki, nā te au tamariki mama’ata ake...
- Tēta’i Au Tāmataora - e Monomono, ‘ē Pinikō, au pere ngutu’are, te pere...
- Te ‘Ākarakara Ora / Te Au ‘Oro’oro’anga, Te au Teretere’anga, Te au Rere’anga